

# Chastels e turs en il Grischun

La Terra Grischuna cun blera invista e buna survista

■ **(anr/gc) Igl è da renconuscher co la Terra Grischuna, quella revista per la natira, cultura e temp liber en il Grischun, vegn d'edir sis giadas ad onn bels numers tant pertutgant tematicas sco illustraziuns.** Mintgacas è questa publicaziun – sut l'egida da *Markus Joo* – ina fitg buna e simpatica reclama per nos chantun Grischun en general. Sur da turs-baselgia e dad autras rapporta la novissima ediziun extendidamain e zunt informativamain.

## Bleras furmas e pliras funcziuns

Mussà e descrit vegnan turs, stadas abitas antruras. Era datti en il Grischun blers bajetgs cun turs ch'als laschavan perquai parair fitg represchentativs. Las baselgias han survegnì pir davent dal 11. tschientaner clutgers. Talas turs valevan avant sco simbols da luschezza e superbia umana en allusiuin a la tur da Babilon. Clutgers han tant ina funcziun ecclesiastica sco profana ed ils blers s'audan perquai per la mesadad a las plaivs e vischnancas politicas. I dat da tuttas sorts da clutgers en il Grischun. Interessant è d'intervegnir ch'il clutger da la baselgia evangelica da s. Martin a Cuir è gist per in meter pli aut che la tur da la catedrala vischina. – Avant 50 onns han ins entschavì a bajegiar era en il Grischun, a Cuir, chasas autas sco turs. Quai n'ha betg durà ditg. Ussa datti denton puspè tals edifizis en l'autezza en il «City Chur West.»

Il Grischun vala sco enconuschent pajais da chastels. Tar in vair chastè s'udeva era ina tur. Anc en pliras talas perditgas da vesair en il Grischun. Ils umens da crap – era ina spezia da tur – vegnan definids

sco mussavias da craps in sin l'auter. Tar novas turs sa drizza l'autezza da quellas era mintgamai tenor lur funcziun. – I dat en il Grischun era turs che la natira ha costruì e ch'èn da vesair per sumeglia en la Ruinaulta. Medemamain èn turs in grep decorativ, tranter dus munds, sco al Falknis.

## Era uonn il premi da la Terra Grischuna

La Terra Grischuna dat onn per onn in premi. Sco candidats e candidata èn il regissur *Alfred Berger*, Jenins, la conservatura *Marianne Fischbacher*, Glion, ed il musicist *Jürg Kaufmann*, Favugn, ve-

gnids nominads. Ussa pon ins sa decider cun ina carta per il preferì u preferida. – Rapportà vegn d'ina excursiun da la Terra Grischuna tar lieus dal patrimoni mundial da l'Unesco sco era dad in viadi en ina cuntrada pauc enconuscha tras la Schraubachtobel da Schuders vers Aschera/Schiers. Sa regurdà vegn dal musicist grischun Meinrad Schütter, naschì avant 100 onns. Simpatic è l'inscunter cun *Donata Willi*, dal Posthotel Löwen a Mulegns, cun il «bab dals mez-mieur e mez-utschè», *Lorenz Göddemeier*, a Fläsch e cun ils possessurs da la Chasa Vogel a Maton, enta Schons, ch'era gia dal temp medieval ina tur abitada.



**Il frontispizi da la nova Terra Grischuna davart chastels e turs.**